

## NAQQIUT

Taarserpaa akissuteqaat 20. aprili 2026-meersoq  
(UPA2026/93 UKA2026-mut kinguartinneqarpoq.)

**UPA2026/64: ”Meeqqat atuarfiani klassimi ataatsimi annerpaamik 18-inik atuartoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaanik Inatsisartut aalajangiiffigisassaattut siunnersuut.”**

(Demokraatit Inatsisartuni ilaasortaataitaat)

**UPA2026/143: ”3. aamma 7. klassimi alloriarfinni allattariarsornermi pinngitsuugassaanngitsunik misilitsissutinik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutinik pisariaqartunik saqqummiussinissaannik, Naalakkersuisut peqquneqarnissaanik Inatsisartut aalajangiiffigisassaattut siunnersuut. Inatsisit, malittarisassallu ukiumi atuarfiusumi 2027/28-mi atuutsilersinneqarsinnaanngorlugit naammassineqassapput.”**

(Demokraatit Inatsiartuni ilaasortaataitaat)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Siullermeerneqarnerat**

Naalakkersuisut aalajangiiffigisassatut siunnersuuteqartunut Demokraatit Inatsisartuni ilaasortaataitaannut qujassuteqarput.

Immikkoortut 64 aamma 143 meeqqat atuarfiannik suliassaqarfimmut tunngasut ataatsimoortillugit oqaluuserineqassapput. Immikkoortut imminnut qanittuummata akissuteqaammi ataatsimoortillugit akissuteqarfigineqarput.

Naalakkersuisut aallarniutigalugu erseqqissassavaat meeqqat atuarfiat atuartut ilisimasassatigit, inooqataanikkut inuttullu ineriikkiartornerinut pingaaruteqartumik tunngaviummat, taamaattumillu inuiaqatigiit ataatsimoortumik ineriartuutaammat. Meeqqat atuarfiat piffissani tamarmi ilikkagaqarniarnermut, atugarissaarnermut inerissimassutsimullu pingaaruteqartuuvoq. Naalakkersuisut siunnersuuteqartut meeqqat atuarfiannut atugassarititaasut nukittorsarnissaannik anguniagaat annertuumik tapersorsorpaat, siunnersuutilu saqqummiunneqartut anguniagaat paasilluarlugit.

Naalakkersuisut klassimi atuartut amerlassusii atuartitsinermut ilinniartitsisullu atuartitsinissap pilersaarusiornissaanut periarfissaannut pingaaruteqarnerat isumaqatigaat. Tamatumali peqatigisaanik erseqqissarneqassaaq klassit atuartunik amerlanerpaanik atuartullit illoqarfinni anginerni ajornartorsiutaammata – pingaartumik Nuummi – nunammi immikkoortuisa sinnerini atuarfinni amerlanerpaani klassini atuagaqatigiit 18-ioreerput taakkualuunniit ataallugit amerlassuseqareerlutik.

Taamaattumik ataatsimut isigigaanni klassini atuatigii amerlassusaannik atuartunut annerpaamik 18-inut appaaniarneq pingaartumik Nuummumt sunniuteqassaaq, tassanimit inuit atuatitsiviit amerlisinneqartariaqassammata, matumani ilaatigut atuatigii ukioqatigiikkuutaanut avitanut nutaanut marlunnut atuarfiliortoqarfiusinnaasumi. Tamanna ilinniartitsisunik pisariaqartitsinerulernermik kinguneqassaaq. Ilinniartitsisunik amigaateqarfioreersumi naatsorsuutigineqassaaq taamatut annertusaaneq nunap immikkoortuisa sinnerinit imaluunniit nunanit allanit ilinniartitsisussarsiornermik matussuserneqartariaqassasoq, tamatumalu kingunerisaanik sumiiffinni allani ilinniartitsisussaaleqineq annertunerulissalluni.

Taaneqartut saniatigut ingerlatsinnermut illuutinullu aningaasartuutit annertunerulertussaapput. Naatsorsuigallannerit takutippaat klassit iliniartitsisullu atorfiisa amerleriarnissaat pisariaqartinneqassasut, taamaattumillu aningaasaqarnikkut kingunerisassat tamakkerlutik annertuujumaarput erseqqissarneqartariaqassallutillu.

Matumani oqaatigineqassaaq inatsit atuuttoq tunngavigalugu atuartut ilikkariartornerisa atugarissaarnerisalu pisariaqartippassuk klassimi atuartut ikilisinneqarnissaannut piginnaatitsereermat. Kommunalbestyrelsit najukkaminni klassini atuatigii amerlassusaannik ikilisisillutik aalajangersaanissaminut aamma periarfissaqarput. Taakku ilutigisaannik atuartut 18-iunissaat ersarissumik aalajangersarneqarnikuunngilaq, tassa pisariaqartitsineq allanngorarsinnaasarmat aamma pisut ilaanni klassini atuatigii amerlassusimikkut ikinnerusinnaallutillu amerlanerusinnaanerit pisariaqarsinnaasarpoq.

Tamatuma saniatigut Naalakkersuisut erseqqissassavaat atuarfik pillugu inatsisip allanngortinneqarnissaanik siunnersuut (UPA2026/35) aqutugalugu nukarliit alloriarfianni atuatitsinerup pitsaassusiata nukittorsaafigineqarnissaa suliniutigineqalereermat. Matumani atuatitsissutit aqqissuuteqqillugit atuatitsissutit ikilineqarput ataatiginnerulersillugit, itisiliinissamut piffissaqarnerulersitsisoqarpoq atuartullu atugarissaarnerit kiisalu oqaatsinik atuinerat ilikkagaqarniarnikkullu ineriartornerit nukittorsarneqarluni. Atuatitsissutit qitiulluinnartut salliutinissaat ilikkagaqarnissamullu atugassarititaasut pitsaanerusut pilersinnissaat siunertaavoq, klassini atuatigii amerlassusaat kisiat ukkatarinagu.

Naalakkersuisut alloriarfinni pinngitsoornani misilitsinnerit siunertareqqaarneqartut atorneqannginnerat isumaqatigivaat. Misilitsinnerit taakku paasiniaanermut sakkutut ineriartortitaapput, ilinniartitsisut atuatitsinerup perorsaarnermik tunngaveqarlutik pilersaarusiortarnissaannut ikorfartuutaasussaallutik atuartullu ataasiakkaat pisariaqartitaannik suussusersiniutit atorneqartussaallutik.

Oqaatigineqarsinnaavorli misilitsinnerit ullumikkut annertuumik uuttuiniutit aammalu atuarfiit akornanni piffissallu ingerlanerani sanillersuussissutit atorneqarmata. Uuttuiniutit atorneqarnerisa atuuffissaraluisa siunertaat allanngortippaa, misilitsissutit taamaallutik ilikkariartorneq pinerunagu taamaallaat uuttortaanermut atorneqarnerulersinnaallutik.

Taamaattumik Naalakkersuisut isumaqarput tulluartsuussasoq meeqqat atuarfianni nalilersuinermi atortut qanoq ilillutik atuartut ilikkagaqarnissaannik, atugarissaarnissaannik ilinniakkamik kullu ineriartornissaannik pitsaanerpaamik tapersorneqarnissaat sukumiinerusumik misissorneqassasoq, tamatumalu ilutigisaanik atuartitsinerup malinnaavigineqarnissaanut pitsaasuunissaanullu qulakkeerinnissutaasumik tunngavimmik qularnaatsumik attassisoqaannarluni.

Naalakkersuisut meeqqat atuarfiata nalilersorneqarnissaanut pilersaaruserput. Tassani atuarfeqarnerup aqqissugaanera atuartitsinerullu pitsaassusaa pingaartutut sammineqartussaapput. Tamatuma saniatigut ilinniartitaanerup iluani Public Expenditure Review (PER-rapport)-ip naammassineqarnissaa utaqqineqarpoq. Misissuinerit taakkua marluk tamarmik naliliinernik inassuteqaatinillu pingaaruteqartunik, siunnersuutitut ukununga saqqummiunneqartunut attuumassuteqartunik, imaqarnissaat naatsorsuutigineqarpoq. Taamaattumik Naalakkersuisut misissuinerit taakkunani paasisat suliniaqqinnerminni ilanngutissavaat siunissamilu atuarfeqarnerup iluani inatsisiumaartussanut malittarisassaajumaartussanullu ilanngunneqarumaassallutik.

Naggasiullugu Naalakkersuisut erseqqissassavaat meeqqat atuarfiata ingerlaavartumik ineriartortinneqarnissaa naleqqussarnissaalu ataatsimoorussamik kissaatigineqarmata, taamaalilluni kalaallit nunaanni pissutsinut naleqquttumik atuartut ilikkagaqarniarnerannut atugarissaarnerannut inerissusaannullu pitsaanerpaamik ikorfartuutaassaaq. Siunnersuutit saqqummiunneqartut qulequttanik pingaarutilinnik tikkuussipput tamarmillu meeqqat atuarfiata pitsaassusaanut sunniuteqartuupput. Naalakkersuisut siunniussat ilikkagaqarsimanermut, atugarissaarnermullu tunngasuummata isumaqatigaat, tamatumali peqatigisaanik meeqqat atuarfiannik ineriartortitsineq oqimaqatigiissumik, ilisimasanik aallaavilimmik nunalu tamakkerlugu sunniutissat ataatsimoortut isiginiarlugit pissasoq erseqqissaatigalugu.

Siuliani taaneqartut tunngavigalugit Naalakkersuisut allannguutissatut siunnersuut imatut isikkoqartoq akuerineqarneqassasoq innersuussutigaa:

*”Naalakkersuisut suleqatigiissitamik meeqqat atuarfiannik sullissisunik pingaaruteqartunik amerlasuunik ilaasortalimmik pilersitsinissaannut Inatsisartut aalajangiinissaannut siunnersuut. Suleqatigiissitaq klassini atuaqatigiit amerlassusaannik pisariaqartitsiviusuni ikilitsivinnissamat periarfissanik qulaajaassaaq kiisalu maannakkut alloriarfinni misilitsittarnerit, ilikkagaqarniarnermut perorsaanermilu atuinermut ikorfartuutaanerulernissaat anguniarlugu, iluarsiivigineqarnissaannik imaluunniit atorunnaarsinneqarnissaannik misissueqqissaarlunilu siunnersuutit saqqummiussissaaq. Sulineq siunissami inatsisunik maleruagassanillu allanngortitereratarsinnaanermut tunngaviliissaaq, suleqatigiissitarlu UKA2027-mi nassuiaammik saqqummiussissalluni.”*